

水經注釋卷五

仁和趙一清誠夫錄

河水五
漯水

又東至鄧湛水從北來注之

河水又東逕河陽縣故城南春秋經書天王狩於河陽

壬申公朝于王所晉侯執衛侯歸于京師春秋左傳僖

公二十八年冬會于溫執衛侯是會也晉侯召襄王以

諸侯見且使王狩仲尼曰以臣召君不可以訓故書曰

天王狩于河陽言非其狩地服虔賈逵曰河陽溫也班

固漢書地理志司馬彪袁山松

一清按通鑑晉紀吳國內史袁崧胡三省曰袁

崧當作袁山松此本晉書列傳耳按傳袁山松有名無字諸本亦有作崧者豈山松卽崧之字而以字行者耶郡國志晉太康地道記十三州志河陽別縣非溫邑也漢高帝六年封陳涓爲侯國王莽之河亭也十三州志曰治河上河孟津河也郭緣生述征記曰踐土今治坂城是名異春秋焉非今河北見者河陽城故縣也在治坂西北蓋晉之溫地故羣儒有溫之論矣魏土地記曰治坂城舊名漢祖渡城險固南臨孟津河洛陽西北四十二里故鄧鄉矣河水又逕臨平亭北帝王世紀曰光武葬臨平亭南西望平陰者也河水又東逕洛陽縣北河之南岸有一碑北面題云洛陽北界津水二渚分屬

之也上舊有河平侯祠祠前有碑今不知所在郭頒世語曰晉文王之世大魚見孟津長數百步高五丈頭在南岸尾在中渚河平侯祠卽斯祠也河水又東逕平縣故城北漢武帝元朔三年封濟北貞王子劉遂爲侯國

沈氏曰漢表作濟北式王子此從史表又史表貞王子十一人其五人漢表以爲式王子莫可考也

王莽

之所謂治平矣俗謂之小平也有高祖講武場河北側岸有二城相對置北中郎府徙諸徒隸府戶并羽林虎賁領隊防之河水南對首陽山春秋所謂首戴也夷齊之歌所矣曰登彼西山上夷齊之廟前有二碑並是後漢河南尹廣陵陳導洛陽令徐循與處士平原蘇騰

南陽何進等立事見其碑

全氏曰按續漢書五行志注引蔡邕作夷齊廟碑熹平五

年天下大旱禱請名山處士平原蘇騰字元成夢陟首陽有神馬之使在道明覺而思之以夢陟上聞詔使者登山升祠天尋雨是卽善長所云事具其碑也又有周然是平陽非平原考洪氏隸釋所引則是平原

公廟魏氏起元武觀於芒垂張景陽元武觀賦所謂高樓特起竦峙嵒巖直亭亭以孤立延千里之清飈也朝廷又置冰室於斯阜室內有冰井春秋左傳曰日在北陸而藏冰常以十二月採冰於河津之隘峽石之阿北陰之中卽邠詩二之日鑿冰沖沖矣而內於井室所謂納於凌陰者也河南有鉤陳壘世傳武王伐紂八百諸侯所會處尙書所謂不期同時也紫微有鉤陳之宿主

鬪訟兵陣故遁甲攻取之法以所攻神與句陳并氣下
制所臨之辰則祿禽敵是以壘資其名矣河水至斯有
盟津之目論衡曰武王伐紂升舟陽侯波起疾風逆流
武王操黃鉞而麾之風波畢除中流白魚入于舟爝以
告天與八百諸侯咸同此盟尙書所謂不謀同辭也故
曰孟津亦曰盟津尙書所謂東至于孟津者也又曰富
平津晉陽秋曰杜預造河橋於富平津所謂造舟爲梁
也又謂之曰陶河魏尙書僕射杜畿以帝將幸許試樓
船覆於陶河謂此也昔禹治洪水觀於河見白面長人
魚身出曰吾河精也授禹河圖而還於淵及子朝篡位

與敬王戰乃取周之寶玉沈河以祈福後二日津人得之於河上將賣之則變而爲石及敬王位定得玉者獻之復爲玉也河水又東沮水入焉山海經曰和山上無草木而多瑤碧實惟河之九都是山也五曲九水出焉合而北流注于河其陽多倉玉吉神泰逢司之是好居於蒺山之陽出入有光呂氏春秋曰夏后氏孔甲田於東陽蒺山遇大風雨迷惑入於民室皇甫謐帝王世紀以爲卽東首陽山也蓋是山之殊目矣今於首陽東山無水以應之當是今古世懸川域改狀矣

全氏曰按魏書地形志曰

武德郡溫縣有貝水予謂善長尙未能詳貝水之顛末則地形志所言亦襲舊文書之耳竊疑是湨梁之湨水

而誤爲湏字蓋湏水正流入河支流入濟適當溫原之地善長偶有不照遽引山經之言滑突了之而云無水以應川域改狀則不識湏水之爲誤文也昔帝堯修壇河洛擇良議沈率舜

等升於首山而導河渚有五老遊焉相謂河圖將來告帝以期知我者重瞳也五老乃翻爲流星而升於昴卽於此也又東沛水注焉

又東過鞏縣北

河水於此有五社渡爲五社津

一清按章懷後漢書注引水經注曰五社津一

名土社津蓋異名也

建武元年朱鮪遣持節使者賈彊討難將軍

蘇茂將三萬人從五社津渡攻溫馮異遣校尉與寇恂合擊之大敗追至河上生擒萬餘人投河而死者數千

人縣北有山臨河謂之崆嶺邱其下有穴謂之鞏穴言潛通淮浦北達於河直穴有渚謂之鮪渚成公子安大河賦曰鱸鯉王鮪暮春來遊周禮春薦鮪然非時及佗處則無故河自鮪穴已上又兼鮪稱呂氏春秋稱武王伐紂至鮪水紂使膠鬲候周師卽是處也

洛水從縣西北流注之

洛水於鞏縣東逕洛汭北對琅邪渚入於河謂之洛口矣自縣西來而北流注河清濁異流轍焉殊別應瑒靈河賦曰資靈川之遐源出崑崙之神邱涉津洛之阪泉播九道於中州者也

又東過成臯縣北濟水從北來注之

河水自洛口又東左逕平臯縣南又東逕懷縣南濟水
故道之所入與成臯分河河水又逕黃馬坂北謂之黃
馬關孫登之去楊駿作書與洛中故人處也河水又東
逕旋門坂北今成臯西大坂者也升陟此坂而東趣成
臯也曹大家東征賦曰望河洛之交流看成臯之旋門
者也河水東逕成臯大伾山下爾雅曰山一成謂之伾
許慎吕忱等並以爲邱一成也孔安國以爲再成曰伾
亦或以爲地名非也尙書禹貢曰過洛汭至大伾者也
鄭康成曰地喉也沚出伾際矣然則大伾在河內修武

武德之界沛沅之水與滎播澤出入自此然則大伾卽

是山矣

禹貢錐指曰鄭元云大伾在修武武德之界張揖云成臯縣山也漢書音義有臣瓚者以爲修

武武德無此山也成臯縣山又不一成今黎陽縣山臨河豈不是大伾乎又曰薛士龍曰大伾山許慎說文今黎陽之黎山是其說不始于臣瓚矣今按伾字說文俱無伾字下引詩以車伾伾字下云邱再成者與孔傳同並無薛所稱語慎有五經異義或出其中然宋時此書已亡薛何由見且鄭康成生于慎後張揖三國魏人可見漢魏時未有指黎山爲大伾者實臣瓚倡之鄭元猶不從從瓚自穎達始此後人勝前人處薛所稱疑是徐鍇說文繫傳語出楚金誤爲叔重耳又云大伾山在汜縣西一里有大澗九曲一名九曲山西去洛口裁四十里非禹貢之大伾也明甚 伾北卽經所謂濟水從北來注之者

也今沛水自溫縣入河不于此也所入者奉溝水耳卽

沛沅之故瀆矣

禹貢錐指曰濟水於武德入河南直成臯今汜水河陰之界是也其後由溫縣

入河則南直鞏縣所謂津渠勢改不與昔同者也今其故道盡陷河中濟水唯從枝津之合渙水者至孟縣東南入河南至孟津縣其流益短矣

由大禹而來濟入河之道凡再變

成臯縣之故城在伾

上縈帶伾臯絕岸峻周高四十許丈城張翕嶮崎而不平春秋傳曰制嚴邑也虢叔死焉卽東虢也魯襄公二年七月晉成公與諸侯會于戚遂城虎牢以逼鄭求平也蓋修故耳穆天子傳曰天子射鳥獵獸於鄭圃命虞人掠林有虎在於葭中天子將至七萃之士高奔戎生擒虎而獻之天子命之爲柙畜之東虞

全氏曰按東虞漢志師古注作

東虢是也元和志引此文作東隅

是曰虎牢矣然則虎牢之名自此始

也秦以爲關漢乃縣之城西北隅有小城周三里北面

列觀臨河茗茗孤上景明中言之壽春路直茲邑昇眺
清遠勢盡川陸羈途游至有傷深情河水南對玉門昔
漢祖與滕公潛出濟於是處也門東對臨河側岸有土
穴魏攻北司州刺史毛德祖於虎牢戰經二百日不尅
城惟一井井深四十丈山勢峻峭不容防捍潛作地道
取井余頃因公至彼故往尋之其穴處猶存河水又東
合汜水水南出浮戲山世謂之曰方山也北流東關水
出於嵩渚之山也泉發於層阜之上源兩枝分流瀉
注世謂之石泉水也東流爲索水西注爲東關水西北
流楊蘭水注之水出井山西北流注于東關水又西北

清水入焉水自東浦西流與東關水合而亂流注于汜
汜水又北右合石城水水出石城山其山複澗重嶺欹
疊若城山頂泉流瀑布懸瀉下有濫泉東流洩注邊有
數十石畦畦有野蔬巖側石窟數口隱跡存焉而不知
誰所經始也又東北流注于汜水汜水下北合鄠水水
西出婁山至冬則煖故世謂之溫泉東北流逕田鄠谷
謂之田鄠溪水東流注于汜水汜水又北逕虎牢城東
漢破司馬欣曹咎於是水之上汜水又北流注于河征
艱賦所謂步汜口之芳草弔周襄之鄙館者也余按先
儒之論周襄所居在潁川襄城縣是乃城名非爲水目

原夫致繆之由俱以汜鄭爲名故也是爲爽矣又按郭緣生述征記劉澄之永初記並言高祖卽帝位於是水之陽今不復知舊壇所在盧諶崔雲亦言是矣余按高皇帝受天命於定陶汜水又不在此也於是求壇故無髣髴矣河水又東逕板城北有津謂之板城渚口河水又東逕五龍塢北臨長河塢有五龍祠應劭云崑崙山廟在河南滎陽縣疑卽此祠所未詳

又東過滎陽縣北蕩蕩渠出焉

大禹塞滎澤開之以通淮泗卽經所謂蕩蕩渠也

全氏曰以

滎澤爲禹所塞善長之繆極矣一清按禹貢豫州云滎波旣豬禹陂水爲澤故道元濟水注云大禹塞其淫水

則指旣豬而言此言禹塞滎澤辭不達意未爲大非漢
惟云開之以通淮泗則指鴻溝爲禹迹乃其謬耳

平帝之世河汴決壞未及得修汴渠東侵日月彌廣水
門故處皆在河中漢明帝永平十二年議治汴渠上乃
引樂浪人王景問理水形便景陳利害應對敏捷帝甚
善之乃賜山海經河渠書禹貢圖及以錢帛後作堤發
卒數十萬詔景與將作謁者王吳共築堤防修塌起自
滎陽東至千乘海口千有餘里景乃商度地勢鑿山開
澗防遏衝要疏決壅積十里一水門更相洞注無復滲
漏之患明年渠成帝親巡行詔濱河郡國置河堤員吏
如西京舊制景由是顯名王吳及諸從事者皆增秩一

等順帝陽嘉中又自汴口以東緣河積石爲堰通古渠

口咸曰金堤靈帝建甯中又增修石門以遏渠口水盛

則通注津耗則輟流

禹貢錐指曰司馬彪不志河渠東漢以後無可考據賴有水經注存

其所敘當時見行之河自涼城縣長壽津東逕鐵邱南至東北逕甲下邑北又東北入于海皆東漢以後大河之所行也又曰王景修渠築堤自滎陽東至千乘海口千餘里則其所治者即東漢以後大河之經流也而史稱汴渠又曰汴渠成始終皆不言河蓋建都洛陽東方之漕全資汴渠故惟此爲急河汴分流則運道無患治河所以治汴也自平帝之後汴流東侵日月益甚建武十年陽武令張汜上言河決積久侵毀濟渠漂數十許縣是其時濟亦決敗矣莽時河入濟南千乘則侵濟處更多故築堤自滎陽至千乘海口千餘里永平十三年詔曰河汴分流復其舊迹陶邱以北漸就墳壤十五年景從駕東巡至無鹽帝美其功拜河堤使者賜車馬兼錢陶邱今定陶無鹽今東平皆濟水所經之地也二渠既成則東南之漕由汴入河西北之漕由濟入河舳舻